

# JARIDA LA MTANDAONI

Tabora



## MWAROBAINI HUDUMA ZA MATIBABU NI SHERIA YA BIMA YA AFYA KWA WOTE-MUHIMBI

Na Mwandishi Wetu, Tabora

Mwenyekiti wa Bodi ya Wakurugenzi wa Mfuko wa Taifa wa Bima ya Afya (NHIF), Bw. Juma Muhimbi amesema kuwa, mwarobaini wa changamoto zote zinazolalamikiwa na wananchi juu ya mfumo wa bima ya afya nchini ni Sheria ya Bima ya Afya kwa wote.

Hayo ameyasema leo wakati akizungumza kwenye mkutano wa Wadau wa NHIF kutoka Wilaya zote za Mkoa wa Tabora ambao ulilenga kujadili uboreshaji wa huduma zinazotolewa na Mfuko pamoja na kupokea maoni ya wadau wake.

“Zimekuwepo changamoto mbalimbali na hapa mmezisema zikiwemo za baadhi ya huduma kutokuwemo kwenye kitita cha mafao, ujumuishwaji wa wategemezi katika huduma na changamoto zingine, lakini ndugu zangu niwaambie hapa mwarobaini wa matatizo yote yaliyopo ni Sheria ya Bima ya Afya kwa wote ambayo ndio pekee imebeba utatuzi wa changamoto hizi, hivyo tuunge mkono wakati itakapopitishwa,” alisema.

Akijibu hoja za wadau wa Mfuko, ambazo zilitaka Mfuko uendelee kuboresha kitita cha mafao, alisema kuwa Mfuko utaendelea kuboresha kitita hicho kwa kuzingatia uwezo wake ili kulinda uhai na kuwezesha uendeleu

wa utoaji wa huduma za matibabu.

“Maboresho yoyote yatafanyika kwa kuzingatia taratibu na sheria zilizopo lakini kubwa zaidi kila mdau ahakikishe anaulinda Mfuko ili uendelee kuwa imara na kuhudumia wanachama wake, maoni yote mliyoyatoa hapa Bodi imeyachukua na itayafanyia kazi lakini na nyie wadau hakikisheni mnatimiza wajibu wenu,” alisema Bw. Muhimbi.

Naye Mganga Mkuu wa Mkoa wa Tabora, Dkt. Honoratha Rutatinisirwa aliwataka Watoa huduma kuimarisha upatikanaji wa huduma za matibabu kwa wanachama ili kuondokana na malalamiko yasiyokuwa na tija.

“Kwa Mkoa wa Tabora tuna jumla ya Vituo 353 ambavyo vimesajiliwa kuhudumia wanachama wa Mfuko hivyo ni vyema vituo vyote vikaendelea kuzingatia miongozo ya utoaji wa huduma na inayotolewa na NHIF kulingana na mikataba mliyoingia ili kuwezesha upatikanaji wa huduma bora kwa wanachama na eneo jingine ambalo mnatakiwa kulisimamia vizuri ni ujazaji wa fomu za matibabu ambazo ndio zimekuwa chanzo cha hoja nyingi za ukaguzi,” alisema Dkt. Rutatinisirwa.

Kwa upande wa wadau hao, waliupongeza Mfuko kwa hatua iliyochukua ya kukutana nao kupitia njia ya vikao kwa lengo la kuchukua maoni na ushauri katika uboreshaji wa huduma zake kwa wanachama.





## WADAU UNGENI MKONO HOJA BIMA YA AFYA KWA WOTE - NHIF

Na Mwandishi Wetu, Tabora

Wadau wa Mfuko wa Taifa wa Bima ya Afya (NHIF), wameombwa kuunga mkono hoja ya Serikali ya kuwepo kwa Sheria ya Bima ya Afya kwa wote ili kuweza kukabiliana na gharama kubwa za matibabu hususan katika magonjwa yasiyo ya kuambukiza.

Gharama za kulipia matibabu ya magonjwa yasiyo ya kuambukiza ikiwemo figo, saratani, shinikizo la damu na mengine imekuwa ikiongezeka mwaka hadi mwaka jambo ambalo ni changamoto kubwa katika kumudu gharama hizo na wakati mwingine zinawaingiza wananchi kwenye umasikini kwa kuuza mali zao.

Hayo yamesemwa na Mkurugenzi wa Wanachama wa NHIF, Bw. Christopher Mapunda kwenye kikao cha Wadau wa Mfuko huo kilichofanyika leo Mkoani Tabora kilicholenga kujadili namna bora ya uboreshaji wa huduma zake na kupata maoni kutoka kwa wadau hao.

“Kuna kasi kubwa ya ongezeko la magonjwa yasiyo ya kuambukiza kama vile kisukari, figo, saratani, shinikizo la damu ambayo gharama zake ni kubwa. Mathalani gharama za matibabu hayo zimeongezeka kutoka shilingi bilioni 35.65 mwaka 2016/17 hadi kufikia shilingi bilioni 99.09 mwaka 2021/22,” alisema.

Ili kukabiliana na gharama hizi, aliwaomba wadau na wananchi kwa ujumla kuunga mkono hoja ya sheria ya Bima ya Afya kwa wote ambayo iko katika hatua za mwisho kusomwa bungeni.

“Endapo sheria hii itapita, wananchi wote watakuwa ndani ya Mfumo wa bima ya afya kwa wote na watapata huduma za matibabu bila kikwazo cha fedha,” alisema.

Akifungua kikao hicho Mwenyekiti wa Bodi ya Wakurugenzi ya NHIF, Bw. Juma Muhimbi alisema lengo la mkutano huo ni kusikiliza maoni ya wadau na ushauri wao juu ya uboreshaji wa huduma za Mfuko.

“Tumekuwa na utaratibu huu ili kuwa na ushirikishwaji wa kutosha katika mabofresho yanayofanywa na Mfuko hivyo tumieni fursa hii kutoa michango yenu ambayo Mfuko itaifanyia kazi,” alisisitiza Bw. Muhimbi.

Naye Meneja wa NHIF Mkoa wa Tabora aliwaomba Wadau hao kuhakikisha wanazingatia taratibu zilizowekwa za kujiunga ikiwemo kuwasilisha nyaraka halisi kwa ajili ya kuthibitisha wategemezi wao na akaongeze kuwa Mfuko utachukua hatua kali endapo utabaini mhusika kughushi nyaraka za kujiunga na uanachama wake.



# HABARI KATIKA PICHA

## MKUTANO WA NHIF NA WADAU WAKE WA MKOA WA TABORA

